



Protocol da la radunanza cumünala dal cumün da Val Müstair

3. radunanza cumünala 2019, dals 21.08.2019, ad uras 20.00 illa sala da gimnastica a Tschierv

Preschaint:

- President: - Rico Lamprecht
- Suprastants: - Gabriella Binkert Becchetti, vicepresidenta
- Aldo Rodigari
- Gian Duri Conrad
- Roman Federspiel
- Daniel Pitsch
- Votants: - 31 (partecipaziun da 2.5 %)
- Giasts: - Silvio Sauter, büro da planisaziun Stauffer / Studach AG, affar nr. 11
- Marco Steck, maior pulizia da las regions ost, affar nr. 10
- Andrea Mittner, substitut schef, pulizia da trafic regiun Engiadina, affar nr. 10
- S-chüsà: - Hansjörg Weber, suprastant (absenza our d'Val)
- David Spinnler e Marco Gilly
- Actuar: - Not Manatschal, manader d'administraziun

1. Salüd / glista da tractandas

President Rico Lamprecht driva la radunanza e spordscha il salüd a las 31 votantas e votants chi s'han radunats illa sala da gimnastica a Tschierv. La glista da tractandas vain acconsentida illa fuorma affischada e protramissa in mincha chasada. Sün giavüsich dals giasts da la pulizia chantunala dumonda president Rico scha la tractanda nr. 5 po gnir trattada sco prüma, davo l'approvaziun dal protocol. A la dumonda vain aderi.

2. Tscherna dals dombravuschs

Sco dombravuschs vegn proponü ed elet Mario Gross-Vollenweider.

3. Approvaziun dal protocol da la radunanza cumünala dals 29.05.2019

Tenor l'art. 29 da la constituziun cumünala sto il protocol da l'ultima radunanza, in quist cas quel dals 29.05.2019, gnir expost per l'invista dals votants almain ün mais davo la radunanza, d'ürant 30 dis, in chasa cumünala. L'exposiziun d'eira publichada illas tablas d'affischa da las singulas fracziuns. Recuors nu sun entrats, uschè cha'l protocol vala sco acceptà.

10 1.10 PULIZIA CUMÜNALA

Approvaziun d'ün credit da fr. 38'000.00 / on a charg dal cumün da Val Müstair per la collavuraziun culla pulizia chantunala e'ls cumüns da Zernez e da S-chanf

Il suprastant dal dicasteri sgürtà / pulizia, Roman Federspiel, da l'introducziun e las infuormaziuns da detagl. Cun la revisiun da la ledscha da pulizia chantunala nu pudaran els plü absolver incum-

benzas e servezzans cumünals. Pels cumüns vuol quai dir chi's varà in avegnir fadia d'accumplir cul agen persunal tuot las lezchas per garantir uorden e sgürezza, sco circumscrit illa ledscha da pulizia dal cumün da Val Müstair. Roman conferma ch'eir oters cumüns sun confruntats cun quista problematica, uschè chi'd es naschüda l'idea d'üna collavuraziun culs cumüns da Zernez, S-chanf e la pulizia chantunala.

Ils discuors han manà a la proposta chi sta uossa in discussiun. La collavuraziun tanter ils cumüns as basa sün ün contrat da rom chi cuntegna ils puncts importants sco cuosts, dürada, formalitats da desditta, structura etc. In singulas cuvegns da prestaziun individualas pon ils trais cumüns abinar culla pulizia chantunala lur incumbenzas, ch'els voutan e ston surdar.

Ils cuosts s'amuntan a totalmaing fr. 100'000.00 per on; da quels fr. 38'000.00 a charg dal cumün da Val Müstair. La dürada minimala da la collavuraziun es definida sün trais ons, dimena a partir dals 01.01.2020 fin als 31.12.2022.

Puncts importants dal contrat da rom tanter ils trais cumüns, Val Müstair, Zernez, S-chanf e la pulizia chantunala GR:

- Dürada dal contrat: minimal 3 ons, a partir dals 01.01.2020
- Cuosts annuals: fr. 100'000.00 / on (pensum da 80 %)
 - part Val Müstair fr. 38'000.00 / on (1'500 abitants, fin qua fr. 8'000.00 / on)
 - part Zernez fr. 44'000.00 / on (1'500 abitants, fin qua fr. 20'000.00 / on)
 - part S-chanf fr. 18'000.00 / on (700 abitants, fin qua fr. 8'000.00 / on)
- Coordinaziun da las incumbenzas be sur la pulizia chantunala, cun resguardar las incumbenzas da prestaziun dals singuls cumüns.

Cuntegns pussibels d'üna cuvegna da prestaziun tanter il cumün da Val Müstair e la pulizia chantunala, a basa dal contrat da rom:

- Campegis proibits
- Trafic quiet in cumün
- Chans e lur patrums
- Zonas da quietezza (sulvaschina)
- Signalisaziun
- Disturbis da canera
- Surdatta da decrets
- Rumida da naiv
- Trafic sün vias da god
- Fumar in restaurants
- Deponias sulvadias
- Uorden sün parcelas publicas
- Occurenzas
- Ramassar cornas e bulais
- Controllas vendita d'alcohol
- Uorden champester

Discussiun:

- Cun divers votums conferman ils preschaints cha la collavuraziun sco circumscrit illa missiva fa sen. Retgnentschas saja però cha las regulaziuns e controllas pon gnir massa restrictivas.
- Davart dals rapreschantants da la pulizia chantunala vain confermà cha las incumbenzas vegnan regladas in üna cuvegna da prestaziun tanter il cumün e la pulizia chantunala. Intervenziuns da lur vart vegnan adüna fattas sün incumbenza dal cumün. Quel decida eir sur da l'intensità. Plü inavant vain eir confermà cha la cuvegna da prestaziun po gnir adattada ad ogni temp, chi douvra quia be d'üna decisiun correspudenta da la suprastanza cumünala.
- Ün votant muossa via sün la problematica dal campar sulvadi, chi's constata sün tuot il territori cumünal. Nos pulizist cumünal, Beat Solinger, conferma chi sun gnüdas fattas quist'on diversas controllas e chi s'ha eir stuvü punir pro cuntravenziuns. Plü inavant manzuna el eir cha'ls lös attractivs pel campar sulvadi ston gnir signalisats cun tablas da scumond.
- Sün la dumonda sco cha'l rechav da las multas vegn scumparti vegn orientà in quel sen cha multas chi vegnan decretadas tenor ledscha cumünala van plainamaing a favur dal cumün. Quellas decretadas seguond ledscha chantunala van cun 80 % al Chantun e 20 % al cumün.
- President Rico Lamprecht conferma cha las lezchas e las pretaisas vegnan adüna plü grondas e chi douvra ün sustegn professiunal. La suprastanza s'es conscianta cha la collavuraziun ha seis predsches. Cun las controllas chi pon gnir fattas pro occurenzas, sco p.ex. la Tour de Ski, Bike Marathon ed oter plü saja eir la pussibilità da generar entradas. El conferma cha'ls cumüns da Zernez e da S-chanf han fingià acconsenti la collavuraziun circumscritta. La suprastanza ha trattà la fatschenda e propuona sainza cuntravusch ün schi per la collavuraziun.

Decisiun:

Cun **29 vuschs da schi**, pro 2 abstenziuns, acconsentischa la radunanza il credit da fr. 38'000.00 / on a charg dal cumün da Val Müstair per la collavuraziun culla pulizia chantunala e'ls cumüns da Zernez e da S-chanf.

11 7.90 PLANISAZIUN LOCALA

Approvaziun da la revisiun parziala da la planisaziun da zonas, spazi d'auas (Gewässerraumzonen)

Plans da zonas e plans generals da fuormaziun 1 : 2'000, approvaziun

- Plan da zonas 1 : 2'500, Müstair, spazi d'aua
- Plan da zonas 1 : 2'500 / 1 : 1'000, Valchava, Sta Maria, spazi d'aua
- Plan da zonas 1 : 2'500, Fuldera, Lü, Lüsai, spazi d'aua
- Plan da zonas 1 : 2'500, Tschier, spazi d'aua

Infuormaziun: Zonas dal spazi d'aua (disposiziun) as drizza seguond l'art. 37a da la ledscha da planisaziun dal Chantun Grischun (KRG, stadi 1. avrigl 2019)

Il planisadur cumünal, Silvio Sauter, büro Stauffer & Studach AG da Cuaira, preschainta la tractanda.

Situaziun / basas:

Als 01.06.2011 es entrada in vigur la revisiun dal uorden da las protecziuns da l'aua (GSchV). Sün basa da la ledscha da la protecziun da las auas circumscriba quel las largezzas minimalas per flüms ed auas quiettas. Ils chantuns sun in oblig da definir fin la fin dal 2018 ils spazis d'aua e da resguardar quels illa planisaziun directiva ed in quella da l'utilisaziun.

In lügl dal 2014 ha l'uffizi per la protecziun da l'ambient Grischun (ANU) infuormà als cumüns cha'ls spazis d'aua ston gnir francats in ün möd precis pro la ventura revisiun da la planisaziun cumünala. Il Chantun ha miss a disposiziun ün manual per la zevraziun dals spazis d'aua sco eir üna carta chi cuntegna tuot ils flüms.

La revisiun da la planisaziun da zonas, spazi d'auas, es gnüda preschantada principi settember 2017 a l'uffizi da planisaziun GR per l'examinaziun preliminar. Cul rapport dals 14.03.2018, e las agiuntas dals 13.04.2018, ha l'uffizi tut posiziun sün la revisiun parziala. Dals 27.09. – 27.10.2018 es la revisiun parziala gnüda publichada publicamaing. Dürant quel temp sun entradas differentas posiziuns in connex cun las zonas dal spazi d'auas. La suprastanza ha trattà ils giavüschs e las propostas e respus in scrit. Las correcturas chi s'ha pudü resguardar i'ls plans da zonas sun gnüdas acconsentidas da la surpastanza illa sezzüda dals 24.04.2019, a man da la radunanza cumünala da quista saira.

Cun divers exaimpels e plans da zonas muossa Silvio Sauter la zevraziun dals spazis d'aua illas fracziuns e delcera la finamira e las consequenzas cha quella ha i'l singul cas. Davo l'acconsentimaint tras la radunanza cumünala succeda la publicaziun da recuors dals 29.08. – 27.09.2019. L'acconsentimaint da la regenza es previs per la fin dal 2019.

Discussiun:

President Rico Lamprecht manzuna cha l'agricultura es in prüma lingia pertocca da la zevraziun dal spazi d'aua. Quai pervi da las distanzas chi ston gnir resguardadas pro la cultivaziun dal terrain chi cunfina cun flüms ed auas. Our da quist motiv sun ils paurs gnüts involvats i'l process sur la società agricola Val Müstair. Giavüschs chi sun gnüts inoltrats dürant la procedura da consultaziun han per gronda part pudü gnir resguardats e comunicats. OTRAS reacziuns o protestas nun haja dat.

Decisiun:

Cun **30 vuschs da schi**, pro 1 abstenziun, accepta la radunanza las revisiuns parzialas da la planisaziun da zonas culs seguaints mezs da planisaziun:

Plans da zonas e plans generals da fuormaziun 1 : 2'000

- Plan da zonas 1 : 2'500, Müstair, spazi d'aua
- Plan da zonas 1 : 2'500 / 1 : 1'000, Valchava, Sta Maria, spazi d'aua
- Plan da zonas 1 : 2'500, Fuldera, Lü, Lüsai, spazi d'aua
- Plan da zonas 1 : 2'500, Tschier, spazi d'aua

6. Varia

- Hans Solinger renda attent cha'ls ultims temporals han manà material e crappa ed impli il chanal da la Muranzina. El vezza quia ün privel pels abitants da Paclera, fracziun da Sta. Maria. President Rico Lamprecht conferma cha la situaziun gnarà examinada dals perits dal cumün e chi gnaran trattas las masüras necessarias.
- Hans-Peter Schreich fa las seguaints objecziuns:
 - Mür da protecziun da l'aua da Vau as rechatta in ün nosch stadi. El es da l'avis cha la protecziun per la fracziun da Valchava nun es in quist cas garantida. Il president coferma cha la suprastanza ha principi da l'on acconsenti ün credit per la planisaziun dal «cuntschet Multa da Vau ».
 - Stadi da las tablas pro l'entrada illa fracziun da Valchava, chi algordan al partenadi cun la cità d'Opfikon. Il president conferma cha la problematica es cuntschainta ed in vista al projet da la «signaletica» vegnan ellas allontanadas, scha ma pussibel amo quist utuon.
 - Reguard concept pel allontanamaint dal s-chart po gnir confermà cha la suprastanza ha surdat in üna da las ultimas sezzüdas l'incumbenza per elavurar ün stüdi per reorganisar tuot il menaschi dal s-chart.
- Mario Danz dumonda sco chi sta cun la piazza da fermativa da posta illa fracziun da Tschier, quartier da Plaz. President Rico Lamprecht manzuna cha davart dal cumün es tuot inizià e cha la balla es uossa pro l'istanza chantunala. El prevezza chi's pudarà cumanzar cun las lavurs l'utuon 2019.

Ad uras 21.30 po president Rico Lamprecht serrar la radunanza. El ingrazcha per la cumparsa e per l'incletta demuossada.

Il president:

L'actuar:

.....
Rico Lamprecht

.....
Not Manatschal